

祭文

祭東嶽文

仰惟五岳之尊實作四方之鎮緣臯頊罹癘鬼忽
夢明神傘蓋舟舩擁衛不乏冠裳貌相雍容甚都
布席若三列爵惟五似來嶺海將賀

闕廷方望塵於山水之間俄接武於泉石之上褒
以已字他年尚許徼靈噉以戍餘凡子何當投巒
一汗而醒再寢而平自憐孱弱之姿敢忘生全之
德爰申望祭用答恩私更乞鴻庥益襄暮齒某不



勝屏營感激禱祝之至謹謝并告

呂相公告改神道祭文代

於惟先人世澤汪濊施于孫子久而未艾蚤塵侍
從晚被

褒封詔予三世恩深九重是曰

君寵亦繇祖德非余實能以徼於國爰闢隧道樹
之豐碑神其往來庶幾格思謹告

祭新建會龍石橋土地之神疏文

雙河上旂九峰支脉橋同駕鵲名肇會龍茲者上

蒙督府厚捐下籍鄉閭協助易木以石撤舊而新
行人免一旦飄風驟雨之虞野老慰百年截漢垂
虹之望疑見鰲擎海島真看龍會天池北拱

黃圖步步祝齊天

聖壽東通赤縣源源呈捧日人文徼神庥屢兆豐
年滙靈氣雄開巨鎮謹告

祭施憲副老師文

門人翰林修撰句吳孫繼臯謹奉辦香束帛自家
至於閩王融即故廣東按察副使前常州太守龍

岡夫子施先生之墓下百拜爲奠而哭以文曰嗟
乎昔人有言士爲知己者死繼臯未嘗不感激嗚
咽於斯也故智伯厚遇豫讓廢仲子爲壽聶政剖
太子請行荆卿裂是夫皆戰國俠客之流赴義立
然諾爭死如鶩彼徒以深知我也何況握道德之
貞符稟人倫之朗鑒一朝拔士於閭沕而耀之光
明者哉初先生由望郎來守吾常也熊軾之席未
暇暖而露冕行春之令未暇頒布也然業已進一
郡五邑之士而都試之矣當是時士亡慮三千人

風簷兢於燈火而冰鑒懸於日月士畢技而呈先
生流目而覽大都以爲亡奇爾自繼臯執卷進而
先生亟賞曰何其詞之具本末也庶幾得當我舉
乎明日以冠多士以遍視於鄉之薦紳以游揚於
學士大夫之道津下者非一而渺微之名字始乃
著人齒頰間矣嗟乎先生之於繼臯何如者哉微
獨此而已繼臯生而貧父且老母病厨無見糧甑
突不日烟又負人子錢若干緡歲盡取責秋毫無
所抵此自盡之術也先生庶其狀亟發帑金佐之

抵償而令以少資買田數畝具饘粥奉其親一意
修業斯與衽席人塗泥中起白骨而肉之何異乎
鄙人何知嚮其利為有德矧若先生故繼臯之欲
傾寸赤於先生即隋之珠可化而獻而楊之環可
變而啣也先生闢書院羣譽髦絃誦其中而繼臯
幾為之領袖日有日程月有月程所以課督切磋
甚備於是繼臯舉於鄉先生弗善也曰碌碌如石
非我所急於爾也借先生奏計試南宮出而誦所
為制義於先生而先生亦弗善也曰是故且弗然
當與第鄉書等耳至繼臯于奉

大對蒙

恩舉首而先生手泥金南歐道中始乃

大喜引觴痛飲徑醉矣憶異時先生書來實云嗟
乎先生之私繼臯與繼臯之幸於先生抑何深也
先生之才靡所不揮霍而雅慕好為文辭於書靡
所不讀而尤邃於嚴周之指於度靡所不包而特
不能伍於當世齷齪小夫及貪墨吏故名愈高而
衆愈忌政已成而謗已叢主爵之貴人修逢迎之
舊郟於上而望風希旨之徒俄中先生太守事落

嶺右觀察歸矣嗟乎斥鳳皇爲鴟梟今詭麒麟爲
不仁毀伯夷爲盜跖今誣貞女而曰淫悠悠蒼天
此何人哉厥後先生粹白之名績稍稍昭明於公
道之口而執政方欲借先生以伸其新法竟引闕
院課士目爲道學終擯先生厲禁四馳比於禍本
蓋至今

明天子採直臣言弛禁去苛廣途收士即亡問先
生再起不起幸一復見興文之盛以爲愉快而先
生先一歲捐館矣嗟乎生而爲世指名今歿而具
道乃大光也有其廢之孰與興兮何陵谷之靡常
也廉吏可爲不可爲兮羗行歌而徬徨也天道恢
恢踈而不漏兮蚤見蕙蘭之芬芳也彼當途豺虎
平地波濤今旣安在又奚足以當先生九泉之一
粲哉今夫解劍而挂墓上之樹者爲心許也多雞
絮酒千里起吊者爲酬知也夫以一帶佩之飾一
聘辟之雅猶生死不相背負如此繼臯而忍負先
生於冥冥者乎哲人萎矣明德不忘典刑喪矣微
言尚在繼臯自分咎愴浮沉即不能蜚藻石渠揚

聲著作効職業之寸尺以副先生特達之知至於
守其拙愚甘所澹泊罔以躁取名罔以利傷行寧
爲鴛質不敢爲泛駕而馳寧爲賤工不敢爲詭遇
而獲茲所盟心於伯樂之誤形矢志於王良之下
乘旦暮兢兢欲用爲報者也嗟乎人非宋玉難招
屈子之魂才媿賈生虛托吳公之舉流水之絃堪
絕山陽之調忍聞是用輕河山跋履之艱望松栢
淒涼之路述恩知之大陔悼年位之何迤興懷俠
烈之風增感存亡之誼酌以明水寫其愚心皎日
不欺列星有耀先生尚終鑒繼臯之區區焉尚饗
同門合祭浮川陸太老先生文

於惟先生太古之遺四明耆舊兩浙著龜學深河
洛道媿皇羲九丘八索徹奧洞疑二儀四象遐覽
玄窺彥方宿範太丘清規蘊靈含曜不銜而奇種
於其身發於吾師三槐顯瑞雙麟應期冲襟對
命駕駿騰螭文章翰苑政事藩司昔秉衡鑑棘院
分藜量包葑菲明照黃驪念茲大造發跡伊誰五
岳有原崑崙崑崙歸百匯有宗裨海逶迤夫子之澤

先生之貽先生多福 天章寵綏行進師保以享
繁祺先生多壽望堇踰耆行滿百齡爲世期頤胡
天不憖萎我芬著參苓改色桃李生悲事有必至
死生則宜情有固然師生之私某等風塵末學門
牆舊知忽聞訃報相對嗟咨百身難贖千里陳辭
溪毛澗酒薄薦靈輶先生不死尚鑒哀思尚饗

祭澹翁王太老師文

於惟先生河岳之精蘊靈含曜不銜而珍栖神養
德惟種召獲駿發厥祥流光奕奕薦生夫子文章
之紀二典三墳五制四始網羅經濟以恢帝紘漁
獵竹素以握文衡在其質色驅黃牝牡瞻彼門墻
太山北斗御風鞭霆爲

帝者師翌輔佐卿而臯而伊六籍以還代有作者
惟我夫子卓然大雅五岳有原西北崑崙百漚有
宗禪海是尊夫子之功誰爲孕毓濬哲惟昌先生
是屬先生而存吾道有光先生而歿斯文皇皇胡
不百齡以覲相業倏焉云殂箕騰昂滅夫子惠我
情好葭莩而我先生不我卒圖

帝用慨噫存我夫子吾屬惘惘生悼死事有必
至往來古今人有不忘師生至情夫子括髮素車
發發門徒匍匐生芻一束嚴霜降正草木爲秋長
夜冥冥萊衣何求河清可俟人壽無幾洒淚臨岐
溱沔風雨嗚呼哀哉尚饗

合祭雙松丁太老先生文

嗚呼大江東迴長淮西流士生其間含貞好修先
生之生曰清河止蘊秀儲靈神栖守視志抗孤隱
節挺喬松清風千古浮雲萬鍾軼太丘範標彥方
格積以流光種而召獲誕毓師尊庭訓有儀揚芳
振藻魁世鳴時石室摛文玉除簪筆載師辟雍尋
晉卿秩 綸扉嚴肅講幄雍容爲 帝者師爲天

下宗舜簡臯夔周隆旦奭夢卜人情師保朝夕先
生而存相業允光胡天不憖而忽云亡悲風南來
有訃淒切事聞 九重卹典孔晰生有象服沒有
鴻恩人曰榮休我心未蕃兩世四朝望耄踰耄豈
不壽考不延一訣某等同上春官並出公門敢言
桃李幸托靈根恩既有原師生父子涕豈無從惻

生悼死會盡者數難贖者身所憫玄理至人不泯
溪毛葱青澗酒勻綠辭告靈輒鑒茲衷曲

路祭李老師母文

嗚呼夫人行矣素車發發丹旒搖搖陰雲莽莽易
水蕭蕭薊門將辭楚天何處黃河中斷衡湘南阻
生不踰閭宦亦相從安識故鄉孰導冥蹤豈不有
子承家萬里爾恨中天母魂誰恃于征于邁疑戀
疑升觀者酸鼻送者撫膺匪厄之悲匪促之震來
乎翟輅去兮孤纓嗟我夫子痛于蒙莊一身繫
萬淚傷亡我等門人視母猶母薤露興歌涕沾于
輶路則有祭祖載之遺持觴荐芷遮獻靈輒輪不
可攀日忽以下往哉永睽相哭原野

合祭范太老師母文

嗚呼菁山之陽太湖之濱振范氏宗寔惟夫人胡
以振之生我夫子爲 帝者師爲學者軌夫人德
曜來歸伯鸞儷芳蘅芷媲美琅玕于筓于筐乃籩
乃豆恭順有儀賓祀無疚天乎忽斷孀闈自憐幸
哉有子式穀遺編夫子大賢機不待截獻策

明廷魁英駕傑玉除簪筆石室摛文兩都振鐸六
館蒸雲朔召承明賈還宣室徹炬宵行橫經晝述
母曰主聖爾惟勉旃古稱報國薦士宜先黃金築
臺朱衣繼畧兩采葑菲一門杞梓水分禪海山起
崑崙夫子之德夫人之恩垂之益虔既貴彌儉惠
問鄉評令德家範翟冠峩峨象服則宜白髮皤皤
望塋踰耆夫子擢南板輿式假津門蕭蕭訃何爲
者是耶非耶淚洒長河事聞

九重卹典孔多豈不榮休不延旦夕豈不壽考而
不千百某等同升義重知己情深師模未遠母訃
何憺慶吊如軫吉凶若夢相告沾襟爲夫子慟月
落不死至人久存悟此玄理存歿何論澗酒一尊
門墻千里執紼難期緘辭告恂

合祭沈年伯祖母王太夫人文

嗚呼賢豈必貴榮豈必壽冥冥者天夫貴難子子
賢難孫數則惟玄於鑠夫人既角而翼亦足而翩
身具五福美閱三世造化疑偏惟夫人生名門淑
媛閔閔婢娟歸於上林和鳴飛逐鳳德凰聯冠珮

則儉籩豆則飭令儀罔愆亦曰恭順亦曰端一嘉
聞孔宣幸哉有子蜚文角藝成均勉旃迅發孫枝
英英玉立高科少年乃諗母教不獨於子於孫亦
然沈稱珠林母殆丹穴江表流傳忽焉一疾溘爾
奄逝賓於上仙人若猶憾天則已備誰曰未全某
等兩附職方母我大母休戚情聯哀哀訃至驚心
隕涕有淚如泉薤露將歌匏瓜各異柰此山川緘
辭束帛遙奠芳帷靈鑒斯虔

祭王太淑人文

太原有赫起司寇公含靈孕秀曰夫人功繫夫人
生寔惟於鄭京兆之挈平陵之孟來歸夫子秉哲
好修乃偶以貞乃相以幽籩豆期馨蘋蘩務飭恭
敬有儀喜愠無色既儔鳳德六產麟姿縹纓雲陛
紕組天墀西省詳寬南邦造士明恥不疑文追歐
驅車嶺表開府淮陽龍章賁賁翟服煌煌子也還
朝母福備只况復青雲見其孫子胡天弗憇一疾
弗延豈不壽考不百斯年嗟爾令子緋袍象笏歸
命自邊待問於闕慌兮惚兮孰訃而傳是耶非耶

淚洒炎天 帝聞日吁朝士淒切司寇重臣舍哀
茹血嗚呼星墜前垣
人竒婺沉於淵歿其何
爲我聞天台仙人所止將無
壺儀在閻隔世而香
錫典在珉重泉而光聖善熟聞椒漿造奠
知千里來薦

祭楊太宰文

嗚呼古今往來理則云然凡厥有生孰能無死顧
如翁者豈可以死哉夫世之悼翁而慰翁者則曰
內肅百僚外寧四塞即旃常史冊未足銘之翁於
功名之際可謂極矣眷懋三朝恩蕃五世即封侯
食采未足方之翁於富貴之際可謂極矣兩子魁
文一人拔武即三槐五桂未足儼之翁於胤嗣之
際可謂極矣夫人生志抗勛猷而不遇其時身遭
榮顯而罔必其後者豈少哉翁也備茲百順夫復
何憾願愚所謂慟者翁之生也關天地之運翁之
出也任國家之重翁之亡也失天下之望蓋翁抱
命世才弱冠而登朝三年令尹八載職方其所孽

畫若迎刃而運驕然解也人以為有姚相之能及其敷歷臬藩載遷開府則少司馬之命下矣制閩邊關之命又下矣其所懾服若撼山而震赫然威也人以為有郭令之風又其入也晉官天曹總茲百職蓋前後被命而起以宮保綰部章者數矣其所銓鏡若懸鑑而照的然當也人以為有山公之鑒夫以翁如是之才之威之鑒即所為國著龜為邦藩衛者非耶所謂社稷是毗蒼生是倚者非耶天下安可以一日而無翁也故翁在則天下有司馬起而遮道聚觀之望翁歿則天下有司馬死而罷市巷哭之悲翁之所係於天下豈輕也某等昔從令子與觀學政凡吾鄉之子弟皆翁令子之子弟則令子之悲獨非吾鄉人之悲乎嗟乎身騎箕尾氣作山川翁身則死翁神不脫緘辭千里聊寫我虔迢迢姑射有淚如漣

祭茗翁王年伯文

嗚呼三江之間五湖之濱代有至人韜光隱淪先生之隱茗溪之上卷帙栖神山川寄放或扶筇杖

或棹蘭舟烟霞萬頃風月三秋沾醉長吟非陶非
李晉室餘芬唐人襲美少亦談藝老猶授經諸生
絳帳鯉也趨庭詩禮傳承貢于 天府職大行人
宣威尊主去年擁傳奉使蒲陽綵衣歸覲壽酒浮
香使節還朝椿顏樂只翻然厭世忽賓仙叟嗚呼
龍章鳳誥不日而馳即翁無意天胡不遺駢祉景
福駸乎日熾業邁古稀而胡遽棄某等令子同升
視翁吾翁情傷白練淚洒丹楓澗酒蕪詞杼衷獻
悃芳靈有知來格而返尚饗

同鄉年家祭茗溪王年伯文

惟翁抱璞含貞履規約矩肥遯丘園棲遯稼圃無
爵亦貴不銜迺珍儒者高蹈聖世逸民既剛以方
亦和而恕軼太丘範標彥方譽茗溪卜隱春月秋
風無羨於外寧汨其中間爲詩歌以助斟酌吟邊
衰鳳江天獨宦惟種召獲厚積流光快哉有子華
國賓王立朝有儀奉使不辱爲瑚爲璣如金如玉
輶車入晉綵服歸吳芳筵壽酒載懽載娛戒曰王
程爾惟勿忒促駕還朝親顏動色何期旬月訃自

南船暮烟踈雨柰此楓橋吁嗟令子春明考績胡
不少延以俟榮錫翁年邁七良古所稀胡不滿百
以享餘暉我聞至人沒亦不死傳稱典刑久而難
圯豈乘元化與仙爲徒長洲茂苑蒐往來乎某等
鄉里後生年家小子嘆舊德亡痛哲人痿簪組鮑
繫山川阻修情傷匹練目斷松楸溪毛葱青澗酒
勻綠寫我寸私寄茲一哭靈其鑒只庶幾格斯蒿
里之曲執紼還期尚饗

祭節翁貢年伯文

惟翁不離畊鑿而信於鄉不涉經濟而德一方不
引銅墨而被冠裳不學黃白而履吉康曷以臻茲
曰繇善良善斯召慶良迺其昌初翁之生抱璞含
芳丁葉之衰幹蠱用光倜儻好義振急存亡類彼
太丘鄉閭所望德立行成令聞颺揚郡國在駕錫
服用章翁實承之洵美且臧類彼彥方衆人以匡
廣陵故侯餘澤漾漾翁嗣其烈永言未央翩翩令
子玉質金相賢科 賜第翁發其祥追惟甲戌春
滿高堂曲江齊宴瞻雲捧觴胡不三載倏焉以翔

寒風颯栗千里蒼黃嗚呼黃山蒼蒼宛水泱泱生
游其間歿於何傍我聞敬亭仙人所藏將無羽化
馭彼鸞皇某等九州之人令予同行視翁吾翁百
身可當溪毛澗酒泣奠徬徨靈乎有知鑒此衷腸
同館祭王午山太史文

嗟嗟太史胡數之竒胡壽之歿胡發之遲胡享之
薄胡促之隨才固不偶理其難知百身莫贖千古
為悲初太史生早負英姿芳聲茂實博學宏詞二
十翔校三十登擢四十鼎甲鳴世魁時石渠載筆
天祿燃藜公輔之器邦家之基宜履遐祉庸需靈
綏溘焉以捐奪者其誰嗚呼謂天不仁曷隆厥施
謂為仁耶竟此何為奎躔宵拚蘭芬晝摧淒其共
巷矧我同池月臨玄酒風來素帷鬼飛燕越身騎
尾箕

門生祭王太史文代

嗚呼太山崔嵬中原所望劃焉其頽州谷無光斗
樞在天紫薇太極一宵而隕星羅失色嗟我夫子
嶽降奎躔胸藏萬卷筆倒三川非熊非羆如龍如

虎清廟珪璋明堂黻黼二十名立三十登廷四十
鼎甲

天語親聆金馬影纓石渠載筆士識經綸人傳著
述見謂殊器公輔之基不亦標軌爲天下師胡天
不吊忌才殃德一疾弗延亦已其亟嗚呼夫子之
學洞徹淵深丹顏未駐黃土何任夫子之文雲流
日麗彩華終懸青燈曷繼夫子之量月霽風光孰
厄其衷而歸杳茫夫子之容金相玉質孰奪其魄
而閉幽室嗚呼謂天不仁業與之才謂爲仁耶而

促何哉有窮者理會盡者數獨斯之酷莫審其故
我聞仙史亦累塵緣既謫爲人復昇爲仙豈其羽
化返於天闕香案中間垂紳正笏某等北方學者
謬廁公門敢言桃李幸托靈根絳帳生寒憶惟初
列百身莫當一慟欲絕

祭朱南陽年丈文

嗟嗟南陽何者非所當壽也而願弗壽也松柏其
榦金玉其相神情內含良賈深藏此相人者所謂
壽也學探本原識通性命發爲詞章如泉斯湧此

觀文者所謂壽也寒暑必慎飲食必節伸息語動
悉有常轍此養生者所謂壽也而况踵前人之芳
躅並難弟之英聲強年聯第初拜郎官蓋其進則
駸駸即位陟樞衡年躋耄耋者顧豈為過倖者耶嗟
嗟南陽是皆所當壽也而乃弗壽也或者曰壽不
朽之令名也古人以德與功與言為三不朽然耶
否耶有德未施有功未就立言固其餘事而天且
躓之場屋使二十年間舍毫美槩以習所謂時文
今方棄其筌蹄發其閭闔以游作者之庭而又重

奪其志天之不欲壽人也如此嗟嗟南陽其當壽
而弗壽也真造物者妒之耶某等南陽同年士也
不惟識其面更知其心所願望於南陽者甚厚而
今則已矣雖然天於南陽固沉珠埋璧爾其用未
究其體全矣在南陽何損也吾輩存則南陽所願
望於吾輩者亦存誠有克自淬礪居一于不朽以
為一榜光則南陽方沾沾九泉矣如徒延歲月費
廩餼以倖貴重而略無表樹於其間甚或貽玷焉
南陽有知不將嗤之羞與齒耶南陽之歿也吾輩

既集其庭而哭之茲靈輻駕矣將歸塋於會稽禹
穴間則死生從此永訣而吾輩醵束芻清醑以酌
於南陽之樞而侑之以辭蓋重以南陽之當壽而
恨其弗壽又毋以南陽之弗壽而吾輩可棄其所
當壽也南陽其鑒之

合祭丁老先生文

嗚呼長淮西迴大海東阻滙結秀靈鬱發鴻鉅初
公尚少而思古人履規約矩蹈義遵仁大對明庭
魁英冠傑忠孝是求温飽匪悅乃趨金馬乃司辟
靡文宣綸紵德被章縫一二邦禮再分邦治入侍
經帷出陪廷議啣哀一返讀禮三冬豈其過毀而
竟相從嗚呼

主德清明待公啓沃溘以長終念此明勛元元計
日需公爲霖望而不見柰彼羣心觀濤莫起落水
逾愴賢哲反促理數難諒遼東鳴雀曰惟令威公
其後耶千年一歸嗚呼生有令聞歿有崇謚人壽
榮名早盡曷媿一芻寄哭千里陳辭寧獨藝林天
下之悲

祭詹老年伯母江太孺人文

江浙上游三衢隩區聞人代興著姓世居著姓維
何爲詹爲江婚媾世聯甲第相望祖佐臺憲父稱
師儒秀鍾賢媛稟德實殊動遵禮法間習威儀慎
擇快士丕則閨幃六禮既修作配司成肅見詹廟
薦以藻蘋贊陳服棗尊章是承凡百僚婦靡不式
欽相爾夫子爲時髦英學成五鹿游薄馬卿筮仕
兩都奏宸

帝廷恩隆所自覃及雞鳴戴鳳被霞輝映德門念

茲宗祏興在得人雖則有子未見振振言求仲氏
塞淵既宜小星有賦如填如篴二麟載紱三鳳聯
飛伯也不永二雛頡頏仲季並起以翔以翔日子
大夫曰尚書郎蘭玉盈堦冠蓋一堂稱壽聖善為
樂未央云胡一疾寶婺沉光計從何來聞者徬徨
隕茲今德天道曷常臯等昔與季君同舉戍闡誼
薦孔懷休戚咸依傷哉大故中心若摧素車欲命
金馬難違何以寫哀眎此旒旂路遠莫致邈焉河
山絮我酒漿擷我楸蘭因仲以往躑躅重關再拜

引領涕淚為潛萬里將誠靈其為餐

祭刑部主事兩豫黃年丈文

嗟嗟兩豫早負英姿芳聲茂實博學宏詞偃蹇一第乃踐 彤墀爽鳩初官白雲迺司哀矜折獄平反示慈世號有功亦比釋之公輔之器邦家之基宜履遐祉用需寵綏溘焉其捐奪者其誰嗚呼謂天不仁已隆厥施謂為仁耶竟此何謂室如懸磬家無羨貲兒號於疚妻哭於帷渺渺穰東途路嶮巖迢迢旅襯孰恃而馳沒者長逝生者安支見者酸鼻聽者攢眉矧余兄弟能無涕洟我聞于公積德務滋爰啓廷尉高門匪欺又聞崇公死獄勤思爰啓文忠龍岡刻碑君所身有先德之貽君之所貽倘在來茲靈輻既戒朔風其吹明尊一慟存亡別離尚饗

祭王母劉恭人文

粵若內則婦尚柔貞母氏聖善慈以嚴成寥廓彤管疇嗣徽音仰惟禘靈儷美積芬昔比部翁淑問虞廷徹部伐堅民頌無克五斗不折解官四明瀟

然田里鳳舉鴻冥佐之者誰曰大恭人闡政茂修
母儀克稱斷織督課和膽助勤迺有侍御聿振家
聲大行奮跡簡在楓宸鉄冠豸服柱後惠文督鯨
淮陽剔蠹更新巡行吳越風紀肅清歸報于

朝媿古埋輪薦慶有源式敕自親有烈母訓著于
朝紳咸謂女士式昌名臣百年壽考寵祿永膺天
胡不憇寶婺匿精計聞侍御攀手號震驚萱墮北堂
栝捲空存板輿弗御蘭芳萎麗生嗚呼生也有涯不
朽惟名矧茲閨閣炳朗德馨兩世濟美禴翟光榮
息勞大塊瑤池返真翱翔青鳥浩劫無垠某等執
鞭侍御夙仰儀刑達觀者理怛化者情綴以蕪詞
奠以澗蘋神其不吐歆此一尊嗚呼尚饗

同年祭高年伯文

惟翁幼秉淵懿長標瓌竒匪俠而烈暮儒而醫仲
產曷減急兄之危終然壁立吟誦常怡心乎利人
岐黃我師爰有論著為時所推於已若忘於德務
滋赤子之心先民之遺天道無親惟善乃私濬發
英賢致身彤墀人欽上第帝寵鴻詞乞為博士曰

永教思出則敷契入焉步夔祿養安只恩綸再馳
胡弗長享奄與世辭七十希有翁業過之豈實數
定而不期頤甬東迢迢山川逶迤行乎間關至止
何期某等通家義厚猶此情悲忍看華轂去作總
帷芻束在几蘭升在卮丘首雖邈箕竟假斯

祭韓老年伯母文

嗚呼繼母如母孝子不殊是在儀禮服亦有圖懿
美夫人金相玉質歸於君子宜家宜室協其恭敬
佐以儉勤幸哉有子我視焉分陋哉閔母冬月爲
虐不見穆姜名芳調藥乃願乃復過於所生是訓
是迪以底厥成閔海蟻葵

天墀振翼初官虞衡而舉其職

帝曰爾才其往承天 陵工重錡爾惟克虔六傳

將馳尺書傳訃奕奕星軺忽焉改素吁嗟往昔孝
感多竒擣泉泉湧母疾竟差胡天不吊母南子北
醫祝罔親理數難憶某等敦世講誼稱年家生承
茲凶問能不傷情旨盍匪嘉有酒匪旨聊攄我哀
靈乎鑒只

祭陳年伯文

於惟先生奮迹海濱儒者高蹈聖世逸民外操直
方內秉淵懿履規約矩咀仁爵義既探六籍亦採
百家吐爲文辭蔚焉以葩蚤易青紫芥可俯拾數
獻弗收荆山抱泣晚起應

詔冠裳自榮俄以子貴

龍章再膺其命彌進其躬彌俯其人雖今其心則
古觀德家庭肅肅雖雖觀化鄉閭一德同風前有
太丘有道長者後有先生卓爾大雅頗傳耆碩洛

社盟投脩然獨往悼彼風流海鷗晝飛亭鶴宵唳
不見行吟空聞雪涕某等九州之人令子同行視
翁我翁百身莫當溪毛葱青澗酒勻綠相望雲間
寄茲一哭

祭戈年伯文

惟翁系出吳會而籍于燕業本土人而迹于廛被
澤獨邇尺五之天種德惟勤方寸之田朝市大隱
都邑高賢其和若醇其直如弦斲雕以樸剖觚爲
園不用於世孰覩厥全無羨於中孰清其淵是稱

孫宗伯集 卷之七
葆真以享大年亦啓哲嗣天池騰騫初官百里行
哉勉旃民瘼殷恤

主德茂宣三載政成

天子嘉焉曰子實良式穀其先乃降 璽書

龍章鳳箋推恩所生錦服春妍見者謂華望者謂
仙自茲景福爲山爲川未論耄耆可彭可篋胡天
弗憇一疾弗延秦人罷春良令其旋都人罷市老
成棄捐矧於某等分戚情聯視翁吾翁淚下如泉
溪毛澗酒薄寫微虔羅拜堂階覓來几筵

祭王母徐太孺人文

於赫王宗亢之者子孰詔厥成曰有母氏母氏來
歸實嬪隱君協其恭敬相以儉勤言不出閭動不
踰閩蘭蒞儷芳金玉比德昔在梁鴻爰配孟光千
年懿淑照映吳昌克濬哲源乃毓賢嗣奮翼登
朝蜚英奉使皇華在路椿萱在堂人傳並茂天錫
全昌曾未幾何蚤忽凋喪慶吊奚常理數難亮憶
爾報使尊人永離甫來謁選母復長辭素車白馬
僕僕途路恨也終天悲哉孺慕差強壽祉並過稀

年非久馳 恩賁於九泉某等令子同升視母吾
母上悼令儀下唁良友聊采澗藻以侑椒漿慈靈
有知來格洋洋

公祭黃對茲年丈文

忠貫金石莫徹九閻名懸日月身不長存古道炳
甚千秋詎諼唯閩有公懸寓麟鶴叔度千頃長鄉
萬言高第起家循令弭繁焯焯寂書燁燁銓論
帝俞公才入拜黃門麟批仗斤曾不昕夕朝陽倏
鳴永豐初謫尋理河間雪沉肺石爽鳩甫膺淮陽

再危悠悠楚蘭孤貞靡格展禽有言吾介曷易宣
室霽明召公藻衡聲栗南國望籍瑤京翫麟猶昔
冰風自盟山公在曹百職倚平彼旻弗繼造物嫉
烜彌留遺竒箕尾莫挽公言可行公遇則蹇公志
方騰公日已晚臯等聯籍公車締誼鷓鴣哲人不
待型范疇如浮雲幾何咄嗟史魚旂旛載南高蓋
栖墟酌以椒漿薦以濱菹焄熹非遙一鑒欵欵尚
饗

合祭王相國母吳太夫人文

嗚呼昔在安仁板輿奉母閑居亦懽不聞踐斗師
亮母孫手詔問年迨其棄養平章外遷於太夫人
實啓相國名壽高齊榮哀備極相國甚孝烏烏繫
思 帝許輟直庸慰母慈相國甚忠計安 宗柘
母曰予往卒以定策十任強起十辭歸歟來同四
皓去亦二疏 賜金羞饌 賜玉縈綵婺曜中台
閣侍元宰八袞初開鶴髮皤皤一品累錫 龍章
孔多言樹萱草綠野之背人歌燕喜百齡未艾豈
其厭世倏而長捐披霞駉雲家不乏仙西池聽璫
南岳擁珮孰是栝棧以憂鼎鶴尺素告哀五位嗚
嗟尚方致賻卹亦云奢維予九列於相國耦義忝
升堂情殷絮酒不腆厥詞曰將遠心綸闈勿慟總
帳其歆尚饗

祭周太夫人文

嗚呼維嶽降靈胚竒育神睠彼邦媛哀此令嬪六
二之貞非儀之令誰其尸之曰維夫人猗歟夫人
維王之裔歸我文恪德音孔儷有儷其德溫柔敬
直陰教是承式彼嬪則克相夫子用揚懿美有夫

有子弘我化理 天子是昆庶士是望金章肅庸
厥庸斯昂迢遙際封載鎮綱紀爲明祭酒萬邦式
止弘美兩朝衣裳雍容匪媿房中曷來茲榮偕我
荼苦以及棟隆蚤誕琳瑯晚復桑梓卜遷訓讀丸
熊信擬百千萬年行復有以胡天不弔貞令忽摧
卿月沉輪婺宿揜輝家喪令儀噉噉同哀人亦有
言百紀莫保有如夫人履順獲考借未塋期亦曰
後老榮哀既備終始以道維余後進通家誼深接
禮論道相知之心不揆弱息賓於高門百慟之態

孰知予心嗚呼哀哉重曰四德令善五禮上秩禮
稱 帝師德副夫職皇哉介秩逝矣華宗怡愉懿
範先周同風琬琰令姿有美螽斯既全婦道亦仰
毋儀庭玉流芳室蘭傳香楚楚象服唯唯河魴翟
輶七襄軒車六命鼎室辭親槐庭贊政斯教斯勤
我恃我有胡天不辰去爾在疚飛青來黷水碧弗
遺月落珠埋春枯桂摧金棗長含銀蚕莫追孤鸞
絕音雙虹去津留連趙瑟悽愴秦笙哀哉尚饗

祭吳太親母文

天鑄廣覆地靈厚載勿勿遷塗芸芸岐類七浪風
摧四山雷邁孰是頓超脫纏豁蓋倚歟惟靈弘懿
中間昔植瓊根今滋寶潤休神凌虛不跡應緣不
遺世相契實開權于歸高門作述君子箴管處職
珈笏協禮玉筐鸚墮金籠蚕起爰從夫榮元衣栢
雉翟茀有輝簧翽薦頤金波迴月綺樹停春屑玉
杵膏和香扇塵彩鴛羅庭紫鸞嘉吟懽故未厭悲
新造及予夫惟謝色服惟子飈焰亦傾靈莖翠泣
既了非有寧實所無訣定一乘彫薰六度業未回
澄識鏡轉露曇彌記外華光補處騰神金渠纏悲
寶樹嗚呼哀哉臯聞偏空互闕大慧雙融遺遺亦
遺空空乃空觀無靡取形礙俱通惟靈唯然圓應
塵中振振令子英英華胃玉震蘭搖金鏘桂縹豈
薄前因孰解嘉媾術識同痛在戚彌疚嗚呼哀哉
歲壑有趨送涯無還珍臺散空緝髮留山風嘯揪
梧雲翳陵巒苦空無常刹那摧顏哀哉尚饗

祭劉封君文

靖江令父

光遲蕙畝和被椒臺春氣傷心摧惻紆懷予懷胡

摧靈修遐謝霧彩晞晨星躔慘夜鳴呼哀哉惟翁
弘懿允迪天真秉夷清昧揮景綰緼薦修罔闕孝
友穆融九德耀區三懿宅躬體道既淵興文有偉
謂倏雄飛而頃幽伏飲露朝蘭飡英夕菊霏微佩
芬沈寥含情漸達鴻羽孚音鶴鳴於爍令子碩響
嗣振華藻炳煥芳烈紛綸揚聞明庭宰物下邑龍
躍偶需鳳舉猶輯康阜用成威和咸宜令有澌澤
惟翁之施禮樂敦俗倫彛是導令有洪訓惟翁之
教積善斯頤自昔格言榮名寵章在福宜蕃哀彼
造物壽仁何愆褒美弘多而矣斯年嗚呼哀哉某
披襟令子菊蔭蘭風仁宅不遐德隣適逢山高已
荒河潤且迥揮袂同瘖執芻有耿獻歲發春江楓
結哀招以楚音蒐兮歸來哀哉尚饗

祭茅鹿門憲副親翁文

歲星謝輝文昌復壁碩德不遺中心如怒嗚呼哀
哉自公以降爰及於期我之仰止內誦心維端明
介辭旨忤譽彰公拂貴人身拙行方行方伊何拙
身翱翔一麾乃出令於青陽譏譏者金受質於鼎

微公弗信民茲焉頽如嬰離懷如罹焚溺孝子今
聞而不永錫丹徒承軌沐欽仁風賑此惇獨爰及
孤窮明德日新克俊克仁德周能事體合機神嚴
罔式刑仁扶物施威和兩振澤湛

皇畿公化大行自北而南恩沃望隆大江載咸慶
輝雲蔭泥潤川漸入配皇宿登景具瞻聲於太常
禮官威儀乃司厥勲庶績祁祁體直秉真慎行居
貞屈曳蹈機與世靡矜青蠅翩翩賢隆忌存孰云
我公不聞斯言壬子惟月予以入粵粵獠暴只隗
類颺忽僉曰我公志厥惠和豈伊弱翰尋言荷戈
元凶既盈垂臂思競侈彼鯨鯢逆我

王命公則赫然舞干起陳金鉞鏡日雲旗降文鵬
鷄隼擊再振其斧龍旂飛藻靈鼓樹羽君子懷德
多人嫉勲河帶靡湮黜我令人言歸丘林就茲初
服獨窳窳嘯有懷如玉切松作糜烹桂以食儀道
無悶于焉考槃惟昔之春枉用相存慶風煜燠嘉
賓在門黃髮兒齒顏如舜華姑射是侶厥色敷腴
謂可萬年長而翩躚如何不弔大命罔延嗚呼哀

哉人玩其華鮮識其實公豈真遷良孰其骨惟公
之庭瓊輝素靈瑾瑜大寶薦於

神京人孰不化惟公上壽人誰不沒惟公昌後金
石垂文永焉不朽子長孟堅庶幾無負尚饗

祭趙肖崔文

舊無錫
令公

蓉湖之濱有祠巋然貌公而祝曰公萬年公庶重
來甘棠勿伐曷飈者氛信公已沒嗚呼傷哉公秉
異姿特達靈通嶽嶽其儀屬屬其衷雄文逸才如
空斯虹渥顏飄髯如松斯風釋褐綰綬來令我邑

我邑不腆勢盖岌岌新權實煩舊逋益急民鮮生
趨士多竄習公曰敝矣令執其咎絃更予鼓劔礪
予剖且批且決予手予口星臨日映電掣霆走維
時利官若飛而肉公析厥角奔迸竄伏大府責課
飛檄更僕公無榜笞課亦不縮有嚴學宮鼓鍾其
錡月朔幸臨矩步盈盈薪之醮之陶此俊英咄彼
芴郡乃窘狂生既威以惠亦溫而理程書煌煌上
考功氏

天子曰能維國杞梓殿材爾需亟其內徙起曹登

孫守作集 卷之七
仙送者萬人且送且泣輓公征輪公去如秋公留
如春何當迎伋以慰借恂曾不逾朞頗聞被疾何
恙不已奉使遄出還

朝我期清和良日函書若新世壽永畢嗚呼傷哉
予猥知舉公執弟子一日非長二天是恃兩兒何
知以錄以齒及門之榮通家之以嗟公已乎百身
何爲祠則有碑予其馬辭獨霍天邊五羊海湄間
關哭公公神在茲嗚呼傷哉尚饗

祭董夫人文

言溯茗雲實鍾靈竒既產英碩亦篤女師華谿孕
珠梅林發枝兩姓之媾百年之期疑疑尚書詞臣
入

直矯矯觀察文章之伯相得益章相視莫逆有子
吾婿有女吾媳於惟宜人來相厥家姑亡已矣姑
病如何亡者墓哭病吾拊摩人曰新婦齊名孝娥
尚書歸來日進賓客瓊筵卜晝華燈繼夕西第之
供中厨是職僮奴凜凜以罔不飭給諫老學屢躋
公車鷄鳴佐勤俄聞唱臚客部少雋青紫芥如丸

熊習勞母氏之劬一堂三世圭傳組襲拜慶疏
榮帔霞冠翟履茲盛際聲光烏奕惟宜人賢宜此
福澤曾幾何年夫君長終市義媒禍爲善降凶壽
夭同盡祖孫相從惟宜人賢而晚茲逢嗚呼傷哉
茫茫世界悠悠陷缺麻姑上仙滄桑幾閱遺產幸
完餘子不劣才明智略女中之傑業開七袞胡不
百齡堂萱委露鏡婺沈星下報而翁無恙一經何
虞尾大應懾神靈嗚呼傷哉我有弱息嫁爾仲子
辜負恩勤間闕生死獲事幽冥想像悲喜宜人之
慟吾女之以白揚蕭疎丹旒徘徊往即給諫葛山
之隈執管劾銘執紼助哀河冰嶺雪間關一杯嗚
呼傷哉尚饗

祭安太親母王太君文

於惟太君相門之秀身繞珠玉家業綺繡一水木
帶喬木相望有莪素封膠山之陽嶷嶷僉憲簪豸
建隼翩翩公子瓊枝玉筍太君來歸百兩將之桃
夭其質蘭郁其儀僉憲解臬林泉却掃敬共旨甘
以娛壽考惟郭宜人嗃嗃厥聲伺色而進先意以

迎繫翁若姑曰爾賢婦是善事我我祐斯厚夫君
績文太學馬游太君治內以無省憂太學好客咄
嗟取辦太君儲胥以佐歡燕家門方盛不佚不驕
迨迫衰冷不震不搖貴婚開府聲勢不有督我兩
兒遺經共守盛衰榮宗處一境忘如彼麻姑幾閱
滄桑未亡之身荏苒三十九原下見曰兒有立兒
故棄我弗我即墮賴有叔氏挈此孤孫丹旒飄飄
蒼原鬱鬱一壑藏棺千人執紼某忝新媾夙耳徽
音扶服會塋噫吁盡心匪人之悲惟德之慕詞以
寫秉靈乎儼願尚饗

祭王懷石文

嗚呼胡形弗流胡化弗遷哀哉我翁不百斯年惟
翁尊人爲名御史豸冠繡衣霜稜嶽峙閩方攬轡
丹陛簪筆桑榆晚榮蘭芽乃茁翁幼而孤其氣槩
雄壯而談詞俯仰生風借資南宮策名委質秩拜
典客威儀棣棣五日治行三日秣駒使彼漳南玉
節金符宣我諭旨夷王崩角惟天使命敢不奉朔
間展父容舊恩屬耳或驩或泣使君有子報命於

朝

天子曰能小臣有母孰是臣矜予告歸里娛綵以
樂開枰促觴門有剝啄倒屣文士扶服民喪容省
南國驛希鄭莊熱心直腸齷齷款款削去城府忘
却冷煖我有宿諾千金可貫我有良朋千金可駕
所嗜古篆印章累累篇什之佳手抄目披飄鬚龐
眉是壽者相飛食疾步垂老轉壯云胡不天兩淫
暴摧靈藥弗投大命是隨嗚呼哀哉某等交深末
契分托密親誼敦世講情薦比鄰斷金攻玉九原
不作朝露夕波彼蒼已虐居諸不停星紀倏移遷
年多悲矧翁之思乃歌些曲乃合明尊哭翁慰翁
翁有子孫伯以詩鳴叔以官嗣階庭林林青緗是
肄神理斯在翁爲不忘蒐今下來桂馥椒香

祭安研亭文

東膠之陽山川鬱紆孰望於斯素封而儒嶽嶽憲
臣有美文孫世其家學以揚執園經生之言探願
抉隱風雅之叶錦腸繡吻詩泣鬼神賦擲金石刻
意攻古揮毫對客既耽竹素亦妙丹青花鳥春愁

雲烟畫冥其人摩詰其庄輞川巖壑幽邈松筠靜
娟是名西林公所游釣以觴以咏以歌以嘯亭館
依然紫翠常新我行其庭不見其人嗚呼傷哉才
弗世庸年復蚤謝空傳翰墨流聲長價生席故業
沒無餘財曷遺嗣人圖史尊壘爾母爾兄以偕爾
室壘壘在殯窀穸未畢爾子爾女爾生也晚有就
外傳有襁中壺婚嫁都遙何如尚平三喪何停貧
不曼卿柰此身事而奔賓客豈蛇之年丁鵬之厄
嗚呼傷哉憶昔髫髻受試爾祖言挹令儀如襲芳
杜垂四十載交懽一日爰締葭莩彌固膠漆忍聞
永隔哭公鄉廬暮而陳觴嗟彼居諸公所未瞑有
司封在九原可作以慰以戴嗚呼傷哉尚饗

祭安老親母吳孺人文

延陵之吳系惟季子禮教家襲官秩世美亦有季
女太史所憐才高詠雪職妙聞絃作嬪華閨實儷
哲士鳴鳳叶占乘龍賀喜惟僉憲公儼在重闈惟
翁素封玉食錦衣處貴不驕居富能嗇敬問寢興
躬督蚕織士曰昧旦女曰鷄鳴力襄本業相勛榮

名咄彼敝表頗狎聲酒御我短裳空房獨守焚香
掃地穆然幽閒林下風氣果見紅顏晚饒子息出
不必已樛木推恩螽斯集祉冥享遐筭以酬靜緣
誰歌薤露曾不艾年於惟孺人雲林之侶豈其厭
世終焉霞舉夫君矯矯壯心丕丕迫耆而隕九原
唱隨某之穉兒幸忝婚媾倚玉情新斷金誼舊俄
聞丹旒權即蒼原縱稽宅兆且邇家園百世之盟
一觴之獻靈乎徘徊鑒此繾綣尚饗

祭王親母華孺人文

夫惟鼎族並起詞林喬木相望絲蘿是尋有美哲
媛乃得快婿如鼓瑟琴以諧伉儷事其舅姑如事
父母敬問寢興恭進滄溟夫子藉甚秩文翩翩戒
曰勿怠祖武在前久之不逢陵陽冷落慰曰勿輟
力耕乃穫所產素封而守儒幃青燈熒熒對此牛
衣所長夏屋矮簷弗艷容膝易安且此蠖屈禮法
罔愆雍穆有儀從爵可卜戩穀是宜胡弗登艾一
疾而萎鴈斷樓頭鸞分鏡裏高堂雙白迸淚千行
何老何壯人生何常傷哉孝女一號同斃豈從地

下將愬上帝妯娒何爲母女繼之兩旬四喪一門
孝慈世闕世德蒙禍特慘真宰乖視善人墮瞻將
無神理有大倚伏寒盡始春剥極必復思昔東里
王翰爲隣稔問懿淑爰締婚姻維余釋兒有來愛
女倚玉懷慙乘龍謬許繫緣之慳尋奪所依相彼
二室而暗春暉丹旄指山素車如水楓落堪悲蘭
芬不死言陳楚觴用釋莊缶噫帳風生靈乎格否

祭萬夫人文

嗚呼世喪母儀宗隕憲師赴者同哀行者增歎矧
辱姻締情百其悲酌酒於筵叩帷陳辭嗚呼哀哉
於爍夫人太陰毓秀德之休明亦固天授惠心婉
孌淑質純茂令儀不忒內則靡疚肇自弱笄有穆
其容言告言歸歸中丞公惟中丞公高明顯融崧
嶽其標江海其秉夫人歸止玉質金相肅拜宗廟
虔奉尊章是爚是練是惟蚕桑是滌是和是惟酒
漿爰公登庸抽書秘府白筆入省彤襜行部阜蓋
太原碧幢東土或留或偕翟冠繡黼德全者昌天
祚方穀夫婦悅康光膺祉祿推恩群御普施疏族

仁聞章明義惠優渥共姜紡績仲尼曰賢貴而能
降夫人有馬服無襲珍膳無儷鮮都人婦子是式
是瞻是名齊德宜享偕老甫臻艾年胡弃中道影
分鏡鸞輝揜婺寶數耶非耶借問蒼昊嗚呼哀哉
公我偕舉金石匪二兩家內子義均姊弟變我季
兒實忝子婿構此慘怛潛焉出涕桓桓中丞嗟哉
棟梁林林賢胤昂立珪璋煌煌愍褒自天未央庶
用慰懷以茲不忘嗚呼哀哉尚饗

祭張苓石母文

於惟太君實家婁東有子而賢來爲寓公寓公之
賢嗜佳山水曰茲九龍斲泉而美爰御板輿乃營
菟裘壽母燕喜哲人好修焚香掃地清吟細酌時
乎興至解衣盤礴曾蟠丘壑筆泚雲烟生絹半幅
青錢幾千薄市甘毳以佐萊舞母曰予樂何必吾
土母齡迫九兒亦踰耆相守一室相安孝慈是謂
色養雖貧亦得誰其背親暮南朝北寸草謝暉靈
萱委除胡不盈百端我州閭白頭兒啼雞骨孺慕
痛極終天哀感行路沒斯塋斯言卽山岡委蛻同

孫宗伯集 卷之七
百十一
盡那知異方升堂義薦皇慕心惻庶歆芳椒庸慰
樂棘尚饗

祭華節母陸孺人文

古稱敬姜是曰女宗彤管流輝副珈式崇猗歆令
母盛厥嬪德翼子允臧嗣徽靡忒鶩湖呈帶鴻嶽
表靈鉅公大族甲姓高門母出於陸世著於吳閩
閱相望眷筆伏蒲胄子女孫婚姻是講爰及結褵
室家競爽婦德令柔君德儆拮据閭內公官用
獎胡天不吊早歲云徂所不即死藐諸遺孤代事

姑嫜攻苦茹荼孝翼聖善俯答玄墟哀哀雙雛其
嗚嘒嘒奮翻以飛一乃永逝能不痛心群生之制
飲泣村膺聿康厥世惟陰隲善惟天樹貞蒼天蒼
天矜此勞人乃詔仲子爰遵先軌藉藉蜚聲翩翩
霞舉成均譽髦泰階造羽伊誰其功奉儀授矩寧
乏紈綺澣濯斯陳寧乏纂組織紕斯親寧甘縞素
爰示儀刑借曰哿矣范彼孤惇言相樹護歲休堅
好疇茲令淑乃弗壽考櫛服班衣宜爾長保云胡
飾中卒焉終老繫余次兒承慈秉恩瞻依在御慰

誨如存卜宅兆原哀轎屈門旋陳王鼎前奏犧尊
嗚呼哀哉尚饗

祭鄒封君文

相彼醜泉流方折圓孰濬發是其源涓涓跂彼長
松垂陰百畝人亦有言根深葉茂猗歟太翁含和
葆真通非徇物介不絕塵鼓篋芹宮擔簦壁水道
允古今義窮經史翁語雕虫壯夫所鄙浮世榮名
視同脫屣爲政於家春霽冬曦佚蕩夷易溫溫色
詞爲德於鄉霜雨以時五服之內咸食其施乃

象賢聯翩獻賦容駟高門漸鴻要路有倬次公夜
玉連城望郎出守再典文衡維

皇錫孝推恩所生綏爾綸綍貫爾簪纓醉心花月
怡情松竹白公香山李老盤谷行開九秩擬膺百
福共羨栖鳶俄驚賦鵬某於令子年誼所敦爰以
冢兒尚翁女孫兩家相望載欣載奔殷殷肺腑啞
啞笑言兕天顏年明我不德有貌未亡猥蒙勤恤
翁復弃世遽返冥極既盡且傷痛薪艱棘言携二
稚敬拜帷堂乃奠於饋乃酌之觴歔歔酸鼻迸淚

沾裳白雲莽互髣髴來嘗尚饗

祭蔣母曹孺人文

夫惟太君秀毓江千家承禮法代襲衣冠厥祖柱
 下嶽嶽持斧本所自出玉堂影組大姑流譽季女
 推賢百里遠嫁百歲締緣箕帚敬共琴瑟靜好芳
 挹芷蘭絜修蘋藻老姑殘齡上食夔夔前子吾子
 穆姜吾師雞鳴戒勤書聲雜杼二簋安儉短衣焚
 燧窮通有命不以夫榮白頭青衿偕老亦亨言稱
 未亡爾命不淑福不臻五壽止踰六嗚呼傷哉嗟

爾君子我所嚴事竒文我賞周親我字維則維程
 胡然雁行伯姊如母余妻所莊人亦有言感恩知
 已一飯未忘九原不起難酬異世追數當年忍聞
 入土下淚如泉丹旄將翔總帷非隔肺附寫哀魂
 歸來格嗚呼傷哉尚饗

祭鄒孺人文 吳令母


世德之後再起斯文惟朝列公德勲不羣惟太夫
 人淑惠令聞宣於名牧作宦惟勤不有賢媛孰延
 其賚栢栢鄭宗保世滋大是昔作州以勞以屯夫

人儷德分艱剖辛豈無六珈布衣練裳豈無官庖
濃鮮却嘗以相夫子沛茲甘棠人亡彌思德亡彌
光交交者禽惠我好音像而祠之桐鄉之心人見
其赫莫覲其陰陰隲格天善餘慶深乃誕高賢奕
世惟芬家學之承資以事君事君伊何奉此三尺
爰奉簡書以蒞澤國百城喁喁仰見天日載笑
載言載荷明德無庸願公公唯有母願公將母百
千其壽天胡不仁忽奪我慈使我明君啣卹而歸
千里溯流蜀道崎嶇母有賢子瞑目含怡其若吳
民止有餘悲嗚呼哀哉人亦有言河潤九里公廻
盼睇施及小子服義歌德滿門沒齒母吾大母百
身可抵豈惟邦人失其怙恃公宵以奔總惟妻其
敢申厥辭用寫我悲尚饗

孫卓傳集 卷之七 百廿五

三十一

孫卓傳集



書